

Kikilim masinauba tu tapucquan

Maaq tu qabasang a, haiza tastulumaq, mudanin a tina, kaupin tama ka saipuk ki uvaz’az, tini ka binanau’az ciin masinauba tu bananaz muskun miqumic. Maqasmav a tama munludun qanup ciin mungquma, ma’aq a itu lumaq tu sinkukuza ka, aminin cia binanau’az tu uvaz’az a malkacia, ma’aq a nauoba tu bananaz a daukang muaz paqaqainan, manaskal a iniqumican nai tastulumaq.

Naluc’an manaqtainga ka acang, masan kitnga amin a taic’aan maqasmav kukuza palahanuc i naluc’an tu sinkukuza. Maaq a bananaz a, palahanuc i naqanup tu sinkukuza, maaq a binanau’az a, nakadavuc saipuk ki lumaq, manahip amin a uvavaz’az.

Namudanin nai qanup a, maskakiiv a tama ki binanau’az uva’az a tu, uka’in a tina suu ka, asat minhamu ki acang tu sinkukuza ciin cihali ka nauba suu’un saipuk, asat mananulu.

Maqasmav a tuqas binanau’az kukuza haan lumaq, maqasmav amin haan acang kukuza, qanglac mitmuqu kukuza. ma’aq a nauba bananaz a, qanglac tataskun i kaviaz cia mudadan kucia pacingku matluqi, mat nii a, namalqatu madamu ki qamutic.

Ma’aq a tuqas binanau’az a, madia ka kukuza’un haan lumaq ciin acang, minpungulin sadudu ki masinauba. Maqmutin a, tinquza ka tuqas binanau’az tu, uka’ang a nauba kalumaq, tinpising cia ka is’aang, kavaa tukbabac kikilim, asat mahiav kinu’anan, pising nakahhu’un i tama. Nii amin naip taqu ki duma tu taic’aan, muaz naip angkuc i qacal kikilim.

Iskahaanin bangkal libus sila vanglaz luluklac i masinauba cia, kucia qacal mapatuc maliciuq i daan kikilim, dungzavin naip mintapucquan tincinqalcingal kusbabai.

Cuqesin a tama cia qanup kalumaq, uka’ a uvava’az ilumaq, kikilimun cia ka uvava’az, nii tu kinu’anan, mindangaz amin a acang tu taic’aan is maqmutan kikilim, muaz nai usadu’an i tapucquan tincicingqal, nii tu kinu’anan i uvaz’az.

Saulaupaku, daukang a tuqas binanau’az angkuc i qacal kusbabai kikilim i masinauba cia madas mulumaq.

一直尋找弟弟的螢火蟲

從前有戶人家，母親去世，家裡剩父親、女兒、兒子一起生活。

射耳祭即將展開。男人準備狩獵、女人準備釀酒，整理家當。父親狩獵出發前，囑咐女兒參與部落婦女的工作，好好照顧弟弟。姊姊和部落婦女一起預備祭典，弟弟則在部落閒晃。天色將暗，驚覺弟弟不在視線範圍內，心急找弟弟，怕被父親訓斥，便帶打火石出門呼喊找弟弟，都沒有回應，離部落越來越遠。直到現在，姊姊還努力的在田野間、在草叢間，敲擊打火石照路，找弟弟回家。